



Cussegl da vischnaunca 2021/2024

Protocol no. 29

Seduta dils 16-02-2024

PROTOCOL

**dalla seduta dil cussegl da vischnaunca,
venderdis, ils 16 da fevrer 2024, allas 19³⁰ – 20⁵⁰
Liug: Center Fontauna, stanza da sedutas Cumiera**

President: Ignaz Venzin

Actuara: Ursina Murer-Fatzer

Presents:

a) Cussegl	Armin Berther Adrian Deflorin Adrian Flepp Otmar Flepp Remo Huonder Armin Manetsch	Silvia Bucheli-Caduff Edgar Durschei Mario Flepp Larissa Fry Schuster Giusep Lozza
------------	---	--

<i>Perstgisas</i>	<i>Theres Burri Gadola Helga Probst-Linder</i>	<i>Roland Cajacob</i>
-------------------	--	-----------------------

b) Suprastonza comunala	René Epp Wendelin Jacomet Paul Flurin Schmidt	Clemens Berther Jris Lombris
----------------------------	---	---------------------------------

c) Direcziun comunala	Andri Hendry, canzlist Ervin Maissen, menader infrastruttura	
--------------------------	---	--

d) Hosps	10	
----------	----	--

Informaziun dil president dil cussegl da vischnaunca

Ils 2 da fevrer 2024 havein nus retschert l'informaziun che la suprastanza communal ha eligiu Roland Cajacob sco niev menader digl uffeci infrastruttura e baghegiar. Cordiala gratulaziun ed ina bun'entschatta giavischein a Roland. Gest cun il medem datum ha Roland Cajacob inoltrau sia demissiun sco commember dil cussegl da vischnaunca. Roland numna sco motiv principal il potenzial per conflicts d'interess entras sia nova funcziun en vischnaunca.

Roland ei staus in engaschau cusseglier, prompts da tedlar e schar valer in auter meini. El ei adina s'engaschus per la caussa.

En num dil cussegl da vischnaunca engraziel jeu a Roland per la lavur prestada e siu engaschi cumplein. La successiun per Roland ei instradada.

Plaid d'avertura dil president

La banca CS meina atras mintg'onni in monitoring per eruir cun tgei fastedis e quitaus che la populaziun svizra sefatschenta. La retscherca vegn fatga tenor reglas scientificas da statistica. Cheutras ein las cefras representativas e varieschan per in pign pertschien. Ils resultats vegnan publicai mintgamai il december el "Sorgenbarometer". Sch'ins cumpareglia las cefras dat ei enqual sorpresa – jeu hai mirau in pèr cefras digl onni vargau cun quellas digl onni 2013. Quei onni han 53% indicau la disoccupaziun sco quitaun suprem, pia ella rangaziun sin plaz in. Igl onni 2023 ha negin menziunau quei punct. Igl onni vargau han 38% fatg patratgs davart la midada dil clima ed il schurmetg digl ambient e dalla natira e 10 onni avon ei quei stau negin tema. Il tema principal digl onni vargau ei cun 40% la cassa da malsauns, il sistem da sanadad. Igl onni 2013 han 26% numnu la carischia sco grond quitaun, il 2023 22%. Semegliont vesa ei ora cun damondas da fugitivs ed il sistem d'asil cun 19 resp. 20%. La segirada AVS (AHV) ha fatschentau 2013 23% ed igl onni vargau 32%. Forsa ha la votaziun che ha liug ils 3 da mars 2024 giu ina influenza sin quels resultats.

Sch'il suveran decida da pagar el futur als pensiunai ina 13avla AVS, caschunass quei cuosts annuals da sur quater milliardas francs. Sa co il resultat vesa ora?

Per l'uiara en l'Ucraina ha la Confederaziun impundiu entochen oz rodund 2.75 mia. francs. Quei en fuorma da furniziun da material, agid humanitar sco era d'allontanar minas en ils territoris contaminai. Plinavon ha il Cussegl federal empermess 1.8 mia. francs per reconstruir quei ch'ei destruiu.

Il cantun ha scaffiu tschun novas plazzas cumpleinas per guardiacatschas. Quei per dar damogn alla catscha sil luf. Cheu savess forsia in Tuatschin far amogna siu survetsch. Pia il daner cuora – enzanua.

Mortoris

Dapi la davosa seduta dil cussegl da vischnaunca ha ei dau in mortori:

- Sigisbert Manetsch-Camadini, naschius ils 11 d'uost 1941, morts ils 6 da fevrer 2024

Naschientschas

Dapi nossa davosa seduta dil cussegl da vischnaunca ha ei dau neginas naschientschas.

Tractandas:

1. Protocol 28-2021/2024
2. Cumissiun da baghegiar: Elecziun pigl onn 2024
3. Via Cons: Project e credit per la sanaziun dalla via ed il remplazzament dalla canalisaziun sco era la separaziun dall'aua da plievgia (messadi 49-2021/2024)
4. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: L'actuara:

Ignaz Venzin

Ursina Murer-Fatzer



Cussegl da vischnaunca 2021/2024

Protocol no. 29

Seduta dils 16-02-2024

1. Protocol 28-2021/2024

Decisiun:

Il protocol nr. 28 dalla seduta dils 23 da schaner 2024 vegn approbaus unanimamein.

Cussegl da vischnaunca Disentis/Mustér
Il president: L'actuara:

Ignaz Venzin

Ursina Murer-Fatzer



Cussegl da vischnaunca 2021/2024

Protocol no. 29

Seduta dils 16-02-2024

2. Cumissiun da baghegiar: Elecziun pigl onn 2024

A caschun dalla seduta constitutiva dils 8 da schaner 2021 ha quest cussegl giu eligiu

- Pascal Beer
- Simon Bisquolm
- Ursin Huonder
- e Ronny Zanin

sco commembers dalla cumissiun da baghegiar per la perioda d'uffeci 2021/2024. Ils 4 da december 2023 han ils numnai annunziàu – nunspitgadamein - lur demissiun en globo. En num dil cussegl da vischnaunca engrazièl jeu als numnai per la lavur prestada e tut lur engaschi en la cumissiun da baghegiar.

Ladinamein ei la suprastanza communal semessa alla tscherca da candidats pils posts vacants. Sin l'annunzia el Fegl ufficial dalla Surselva han tschun persunas demussau interess per la lavur ella cumissiun da baghegiar. El decuors dalla procedura ei ina da quellas persunas seretratga.

Oz savein nus presentar a vus quater persunas ch'eiin promtas da s'engaschar ella cumissiun;

- Victor Candinas, 1969, Acletta, commerciant e keyholder
- Felicia Deflorin, 1985, Vitg, dessignadra da construcziun aulta
- Giuanna Desax-Wetzel, 1972, Faltscharidas, giurista
- Urban Maissen, 1981, Vitg, architect

Giuanna Desax-Wetzel ei denter auter menadra dalla partiziun giuridica e da finzas sco era vicedirectura digl uffeci da baghegiar dil marcau da Turitg.

Il cau dil departament da baghegiar, gerau Wendelin Jacomet, ei automaticamein commember e president dalla cumissiun da baghegiar (ex officio).

Il cussegl fa neginas ulteriuras propostas per commembers ella cumissiun da baghegiar.

Decisiun:

Il cussegl da vischnaunca elegia per la cumissiun da baghegiar pigl onn 2024 unanimamein;

- Victor Candinas, 1969, Acletta, commerciant e keyholder
- Felicia Deflorin, 1985, Vitg, dessignadra da construcziun aulta
- Giuanna Desax-Wetzel, 1972, Faltscharidas, giurista
- Urban Maissen, 1981, Vitg, architect

Cussegl da vischnaunca Disentis/Mustér
Il president: L'actuara:

Ignaz Venzin

Ursina Murer-Fatzer



3. Via Cons: Project e credit per la sanaziun dalla via ed il remplazzament dalla canalisaziun sco era la separaziun dall'aua da plievgia (messadi 49-2021/2024)

Presentaziun

Suprastonza:

Gerau Wendelin Jacomet:

Muort ils gronds cuosts ed arisguard dallas sanaziuns vid ulteriuras vias da rimnada, las qualas han giu prioritad e buc il pli davos muort la capaciad da lavur, eis ei buca stau pusseivel alla vischnaunca da vegnir avon cun quei project.

Oz sa la suprastonza communal presentat al cussegl da vischnaunca il project per la sanaziun dalla Via Cons e la damonda pils credits. La sanaziun dalla Via Cons cumpeggia il spazi sil tschancun dalla Via Alpsu entochen al parcadi Casa Hirundella. La Via Cons denter la Via Alpsu e la Via Lucmagn ei ina via da rimnada. Quella via vegn nezegiada sco via da transit. Ils davos onns ein remeduras vid il catram dalla via e dil passapei stadas necessarias. Las fotografias el messadi muossan la Via Cons en in fetg schliet stan. Ina sanaziun totala ei urgenta.

Igl inschignier Iso Mazzetta dall'ipz ei vegnius incaricau da risguardar el project las mesiras 09 tenor il rapport da Metron (*augmentar l'attractivitat dil vitg*). Davart ils aspects dalla formaziun dalla cuntrada vegn consultau in architect resp. inschignier dalla cuntrada.

Ils cuosts dil project ein avon maun ed ei sa vegnir cuntinuau cun las lavurs d'approbaziun e cul project d'execuziun. Igl ei previu d'entscheiver cun las lavurs el decuors dalla stad/atun 2024 e da cuntinuar quellas igl onn sissu.

Cun la sanaziun dalla Via Cons vegnan tuttas lingias d'aua schubra, la separaziun dallas auas piarsas, energia etc. remplazzadas. Cun la separaziun dallas auas piarsas vegn in grond problem el contuorn dalla casa communal e la Banca Raiffeisen sligiaus. Vehements urezis han caschunau leu gronds donns.

Il passapei, construius igl onn 2019 dalla vart dil plaz da scola vegn mantenius ed optimaus sisum Cons entochen alla casa communal. Il parcadi Retus vegn pustaun dalla vart dil mir santeri ed il parcadi Columbin vegn sanau.

Las vias da quartier ein buca part da quei project. Sin giavisch d'in u l'auter proprietari da schischom san lavurs supplementaras vegnir exequidas. Tals cuosts sto mintga proprietari da schischom surprendre sez.

Pertuccont colligiazions d'autras vias en connex cun la sanaziun Via Cons vegn igl inschignier Iso Mazzetta a presentat en detagl.

Ina survesta dils cuosts anfleis sin pagina 10 ed 11 dil messadi. Ei setracta dalla fasa actuala da segirtad da calculaziun da +/- 10%. Ils cuosts da tiarzs da rodund frs. 160'000.-- per lingias da providiment ein buca cunteni ella calculaziun da cuosts. Tals cuosts vegnan adossai directamein als pertuccai.

Ils cuosts dall'illuminaziun publica ein risguardai els cuosts dalla via. Ils cuosts dall'administraziun communal e digl uffeci infrastruttura e baghegiar ein buca vegni risguardai els cuosts d'in project communal. Denton ein ils cuosts dalla cussegliaziun giuridica per regla vegni risguardai.

La Via Cons vegn giudicada sco via da rimnada che survescha all'avertura generala, pia setracta ei d'ina avertura generala fundamentala che possibilitescha l'avertura, abstrahau d'in grond spazi public era a menaschis da survetsch che surveschan alla publicitad. En quei cass ei la suprastanza communal vegnida tier la conclusiun da desister d'ina procedura da contribuziun (*quei ei vegniu sclariu giuridicamein*).

Per la sanaziun dalla Via Cons basegni dus credits. In credit da frs. 1'849'000.-- per la sanaziun dalla Via Cons ed in credit da frs. 335'000.-- pil remplazzament dalla canalisaziun d'aua tschuffa e la construcziun dalla canalisaziun d'aua schubra.

Ei vegn surdau il plaid ad inschignier Iso Mazzetta per presentar il project en detagl.

Ei suonda la debatta d'entrada.

Cussegl:

Las cefras actualas en cumparegliaziun cun talas dil preventiv svieschan empau. Tgei consequenzas ha quei sil resultat final?

Che la mesira 09 vegn risguardada ei da beneventar.

Tgei ha menau tier la conclusiun ch'ei setracta tier la Via Cons d'ina via generala fundamentala e ch'ei basegna buc ina procedura da contribuziun?

Gerau Wendelin Jacomet:

El preventiv 2024 ein mo ils cuosts dalla lavurs che occuoran uonn risguardai. El proxim preventiv vegnan allura ils cuosts dil proxim onn budgetai.

Sebasond art. 58 al. 2 dalla lescha davart la planisaziun dil territori ein las differentas categorias da vias definidas. Ei la via taxada sco via fundamentala, astgan neginas contribuziuns vegnir incassadas.

Ei suonda la deliberaziun en detagl.

Cussegl:

En plirs cussegls ei vegniu criticau la mesira Via Cons dalla Metron. Cunzun en connex cun ils obstachels, sligiar parcadis e destruir il passapei. La sligiazion gest presentada mereta in compliment. Ch'ils parcadis vegnan construi dalla vart seniastra ei fetg legreivel.

Quei che vegn criticau ei, ch'ils differents criteris che meinan tier la decisiun da desister d'ina contribuziun da perimeter vegnan buca menziunai el messadi. Medemamein vegn constatau che pliras leschas communalas sco p.ex. quella davart l'avertura dil traffic corrispundan buca pli alla situaziun actuala.

Il cantun ha previu da sanar la Via Alpsu. Ei vegn mess en damonda, sch'igl ei veramein prudent da gia ussa instradar la sanaziun dalla Via Cons (*sviaments*)?

Medemamein preveda la Puntreis lavurs da construcziun. Co vesa ei ora sch'ei dat en quei connex donns consecutivs?

Gerau Wendelin Jacomet:

La decisiun finala sch'ei vegn menau atras ina procedura da contribuziun ni buca decida la suprastanza communal. Il cass dalla Via Cons ei vegnius sclarius minuziusamein dil giurist incumbensau.

Ils arguments che mauncan uss el messadi san vegnir aschuntai el messadi che va avon il pievel.

Ei vegn surdau il plaid agl inschignier Iso Mazzetta:

Inschignier Iso Mazzetta:

En connex cun la Via Alpsu: L'emprema etappa succeda uonn, numnadamein la sanaziun dalla punt Clavaniev enviers Funs e tanghescha cheutras buca la sanaziun dalla Via Cons. Tier la sanaziun dalla Via Alpsu sa vegnir sincerau ch'il cantun preveda da negin temps in sviament sur la Via Cons.

Menader infrastruttura Ervin Maissen:

La Via Cons survescha ina gronda part all'interessenza publica. Ei sa buca vegnir constatau che las prescripziuns communalas ein buca correctas ni adequatas al temps. Leu nua ch'il dretg communal ha definiu nuot, leu vala il dretg surordinau sco la nova lescha da planisaziun cantunala. Tuttas vischnauncas han las medemas proceduras.

Igl ei vegniu fatg negina menziun el messadi davart criteris, damai ch'il dretg surordinau declara che las autoritads communalas han quella cumpetenza da classificaziun en loghens ch'ei buca defini claramain.

Il project dalla Puntreis tanghescha buca la Via Cons.

Decisiun:

Sin fundament dallas ponderaziuns menziunadas conceda ils cussegl cun 10 encunter neginas vuschs e duas abstenziuns;

- 1. il credit da frs. 1'849'000.-- per la sanaziun dalla Via Cons cun suttemetter quei conclus el senn digl art. 32 lit. d dalla costituziun communal a la cuminonza da votantas e votants;***
- 2. il credit da frs. 335'000.-- pil remplazzament dalla canalisaziun d'aua tschuffa sco era la construcziun dalla canalisaziun d'aua schubra e da suttemetter quei conclus tenor art. 21. lic. c dalla costituziun communal a la referendum facultativ.***

Plaid final da gerau Wendelin Jacomet:

"En num dalla suprastanza communal engraziell jeu a Vus per Vies sustegn tier quella fatschenta. Quei possibilitescha a nus da cuntinuar cul project dalla Via Cons tenor termin.

Via Raveras

Ella davosa seduta dil cussegl da vischnaunca haveis Vus decidiu encunter l'aboliziun dalla procedura da contribuziun Via Raveras. La via che cumpeggia il spazi sil tschancun dalla Via Lucmagn e dalla Via Cavardiras vegn medemamein nezegiada sco via da transit. Pia setracta ei era cheu d'ina avertura generala fundamentala.

La cussegliera Theres Burri Gadola ha giu tschentau la damonda, schebein ei detti cheu ina basa legala. Giebein, tier aschia ina fatschenta ei il cussegl da vischnaunca la basa legala. territori dil cantun Grischun.

Tenor la costituziun communal ed il regulativ da fatschentas ha il cussegl da vischnaunca la pusseivladad da reponderar ni revegnir d'ina decisiun prida dad ina u l'otra fatschenta.

Per quels motivs supplicheschel jeu il cussegl da nezegiar quella pusseivladad e da reponderar la decisiun ch'ei vegnida prida el davos cussegl tier la fatschenta dalla Via Raveras.

Quella decisiun sa buca succeder questa sera, mobein en in dils proxims cussegls. Cun acceptar l'aboliziun dalla procedura da contribuziun Via Raveras savessen las lavurs vegnir realisadas a moda semplia."

Cussegl da vischnaunca Disentis/Mustér
Il president: L'actuara:

Ignaz Venzin

Ursina Murer-Fatzer



Cussegl da vischnaunca 2021/2024

Protocol no. 29

Seduta dils 16-02-2024

4. Ura da damondas (conform ad art. 44 dil regulativ da fatschentas)

Damondas da cusseglier Edgar Durschei:

Dacuort han ins saviu leger ellas medias ch'il Resort Dieni cun 410 combras da hotel e 119 habitaziuns seigi vegnius lubius dalla vischnaunca da Tujetsch. L'Andermatt Swiss Alps AG vul realisar quei resort tochen la fin 2027. Plinavon ei il hotel Fontauna cun las habitaziuns en realisaziun.

Tgei ponderaziuns ha la suprastonza communal da Mustér fatg pertuccont il traffic che quei caschuna atras il vitg da Mustér? Ei il concept da traffic sco el ei gia vegnius plidentaus pliras gadas el cussegl da vischnaunca vegnius elaboraus? Co vesa ei ora cun la damonda da deputau Clemens Berther alla regenza cantunala pertuccont il sviament da Mustér? Stuess quella damonda vegnir declarada sco fetg urgenta per ch'ei mondi buca 10 onns tochen ch'il sviament ei baghegius? Tgei pusseivladads ha la vischnaunca da far squetsch tier la regenza cantunala?

Risposta da René Epp en num dalla suprastonza communal:

La suprastonza communal selubescha da rispunder las damondas en successiun tenor lur historia.

Ella sessiun dil fevrer 2019 ha deputau Clemens Berther giu inoltrau in'intervenziun el Cussegl grond concernent meglierar la situaziun da traffic denter Mustér e Sumvitg, numnadamein:

- a) La pusseivladad da cumpletar il sistem d'alarm ella Val Lumpegna cun in sistem da telecamond.
- b) Equipar la Val Sogn Placi cun ina pusseivladad da serrar la via en cass da prighel automaticamein.
- c) Da planisar in'untgida pil Vitg da Mustér cun risguardar la Val Sogn Placi.
- d) L'untgida pudess era vegnir realisada en cumbinaziun cun in tunnel.

Ils 23 d'avrel 2019 ha la Regenza rispundiu l'incarica sco suonda:

La Regenza ei promta d'examinar ina miglior dil sistem d'alarm ella Val Lumpegna sco era ina pussevlla sligiazion d'alarm per la Val Sogn Placi.

L'incumbensa concernent in'untgida dil Vitg ei vegnida renviada. Cheu ha la Regenza menziunau ils gronds projects d'untgida ell'Engiadina e la Val Müstair. Per la Regenza ei la problematica dil traffic concernent intensidad e canera pauc urgenta, tonpli ch'il cantun dat peisa sin in bien manteniment dallas vias per ch'il traffic sappi circular spert e senza impediments.

L'incumbensa Berther ei ulteriuramein vegnida sustenida dallas vischnauncas da Sursassiala, Sumvitg e Trun. Las vischnauncas han retschert la medema risposta sco il deputau resp. il Cussegl grond.

La risposta dalla Regenza ei tenuta fetg generala e lai presupponer pauc bien quei che pertucca la projectaziun e pli tard la realisaziun d'ina untgida per nies Vitg. Il Cussegl grond ha la pusseivladad da declarar sil sector legislativ in'istanza per urgenta. La vischnaunca ha cheu neginas pusseivladads.

Surstar fa denton era il fatg ch'il traffic duess esser **sereducius** sin l'altezia dil parcadi Claustra - mesiraziun permanenta dall'ASTRA - naven digl onn 2017 entochen 2022 per

22.9%. Quellas cefras ein buca plausiblas. Per saver cumprovar las cefras dil cantun eis ei necessari da menar atras atgnas mesiraziuns da traffic. Quei selai denton buca realisar senza tonscher ell'atgna buorsa. Vai cheu per metter en damonda las cefras che vegnan eruidas di per di entras l'ASTRA - igl uffeci federal per vias.

Bein ei in concept da traffic vegnius plidentaus el cussegl. La damonda ei tgei finamiras ch'ins sa contonscher cun in tal concept. Perencunter ha la vischnaunca schau elaborar in concept per augmentar l'attractivitat dil Vitg e surdau entginas incaricas en quei connex. Il preventiv 2024 cuntegn entginas posiziuns en connex cun la realisaziun dil concept per augmentar l'attractivitat dil Vitg, denter auter:

- Project Center Vitg frs. 600'000.00
 - Center da sentupada per famiglias frs. 150'000.00
 - Informaziun signaletica frs. 70'000.00
 - Canalisaziun Via Sursilvana frs. 150'000.00
- che stat en direct connex cun sanar la Via Lucmagn naven dalla casa communal entochen amiez il Vitg.

Ulteriuramein ei pendent tiel cantun in concept pil traffic public che sebase sin la lescha nova per la promoziun dil traffic public. Il cantun spetga sin ina risposta digl uffeci federal da traffic concernent la classificaziun dil traffic, provediment fundamental, provediment augmentau e provediment turistic. Tenor la classificaziun san ins quintar cun contribuziuns pli aultas. El cass dil provediment turistic vegn ei a dar neginas contribuziuns.

Ulteriuramein ha la suprastonza communal instradau la procedura per prolungir sin la Via Alpsu la zona 30 entochen tier la sbuccada dalla Via da Scola e dalla Via Claustra. Plinavon in'istanza tier igl uffeci da construcziun bassa per examinar l'introducziun d'ina zona 30 per quietar il traffic e mitigar la canera.

Plinavon ei vegniu inoltrau la fin digl onn 2023 al cantun la damonda da contribuziun concernent adattar las fermadas pil bus local allas pretensiuns dalla lescha davart personas cun impediments.

Da menziunar ei ch'igl uffeci da construcziun bassa persequitescha concernent il Vitg da Mustér empau in'otra strategia che la vischnaunca. Il cantun less baghegiar ora la via dil Lucmagn atras il Vitg. Pil cantun schai in'untgida da Mustér en ina memia liunga vesta. La suprastonza communal dad cheu in'otra prioritat, cunzun era cul focus sin l'untgida. La vischnaunca sa intervegnir tiel cantun cun in'ulteriura incumbensa entras il Cussegl grond cun far menziun dalla situaziun precara, cunzun la stad e dil svilup futur en nosa region che vegn ad effectuar aunc dapli traffic atras nies vitg. Survegnir sustegn dallas deputadas e dils deputai vegn denton buca ad esser aschi sempel. Ulteriuramein savess la vischnaunca p.ex. sin incumbensa dil cussegl da vischnaunca schar menar atras sin agen quen mesiraziuns da traffic per cumprovar las cefras dispiteivlas eruidas entras igl uffeci federal per vias ASTRA.

Sco ulteriura mesira fuss ina resoluziun dil cussegl da vischnaunca en concordanza cun la suprastonza communal per mauns dallas istanzas cantunalas per quels impurtonts interess il mied, actualmein tgunsch il pli effectiv. Ina tala resoluziun fuss tenor art. 45 dil regulativ da fatschentas d'inoltrar a scret al president dil cussegl da vischnaunca. A basa dalla risposta dalla Regenza savess tut tenor vegnir inoltrau in'ulteriura incumbensa el Cussegl grond.

Damondas da cusseglier Ottmar Flepp:

1. Damonda pertuccont demissiun dalla cumissiun e cau d'uffeci da baghegiar. Con lunsch ei la cumissiun da gestiun gia sefatschentada en caussa?

Risposta da René Epp en num dalla suprastonza communal:

La cumissiun da gestiun ei lundervi d'examinar las demissiuns dalla cumissiun da baghegiar e l'abdicaziun dil cau d'uffeci da baghegiar. Duront las davosas jamnas han en quei connex era giu liug in u l'auter discuors denter il president communal ed il president dalla cumissiun da gestiun pertuccont metter a disposiziun documents e cura ch'il rapport d'examinaziun per mauns dalla suprastonza communal savess esser avon maun. Independentamein da quella lavur occuora momentan l'examinaziun dallas structuradas internas entras la fatschenta Curia AG. Ils responsabels dalla firma Curia vegnan - sper l'examinaziun dils

process e l'organisaziun interna e dallas structuradas politicas - era a sefatschentar cun las funcziuns e las descripziuns dallas plazzas - cunzun en vesta dils pensiunaments che vegnan igl onn 2025 el sector digl uffeci infrastruttura e baghegiar sco era el sector dalla serenera e la dismiss da rumians. En quei connex ein revisiuns parzialas d'entginas leschas buca exclaussas. Finamira ei da presentar al cussegl da vischnaunca ils resultats, seigi quei dall'examinaziun entras la Curia resp. rapportar davart ils resultats dalla cumissiun da gestiun ella seduta dil cussegl da vischnaunca dil davos da mars 2024.

2. Tgei eisi cun il vehichel tuc tuc? Con vegn quel duvraus e da tgi (*indigens ni jasters*)? Tgei cuosts caschuna quei per onn alla vischnaunca? Nua vegn quei publicau?

Risposta da René Epp en num dalla suprastanza communal:

Premessa ch'il project da pilot innovativ dalla micromobilitad sappi vegnir instradaus en nossa vischnaunca ei la garanzia dalla segirtad finanziaria. Cunquei che la damonda tier la confederaziun ha buca saviu vegnir risguardada muort massa autras damondas, ein ils responsabels ils davos meins stai lundervi d'elaborar ina nova damonda per sustegn finanziel tier igl uffeci dil traffic public tiel cantun Grischun. Entras la nova lescha dil traffic public ch'ei en vigur dapi uonn eisi pusseivel da recaltgar daners da promoziun per novas fuormas innovativas da mobilitad. Da quei artechel vulan ils responsabels far diever per recaltgar ulteriurs mieds finansials el rom da plirs tschiensmelli francs. Momentan dat ei entginas cuvegnas da prestaziun cun differents partenaris ella vischnaunca. Finanzielmein separticipeschan la vischnaunca, las Penderas da Mustér e la Regiun Surselva annualmein cun frs. 10'000.--. Il project da pilot ha in cuoz da rodund treis onns. Finamira ei d'entscheiver questa primavera cul pilot en nossa vischnaunca e da transferir quel enteifer treis onns ad in menaschi ordinari. Premessa per entscheiver cul pilot ei - sco menziunau - la segirtad finanziaria, la quala duei speronza esser avon maun entochen questa primavera.

Communicaziuns

Gerau Clemens Berther:

La cumissiun da baghegiar Center Fontauna ha previu d'optimar la stanza da sedutas Cumiera. Ei vegn a dar novas measas sco era installaziuns per meglierar l'acustica (*rebattem*).

La proxima seduta dil cussegl da vischnaunca ha liug venderdis, igl 1. da mars 2024.

Cussegl da vischnaunca Disentis/Mustér
Il president: L'actuara:

Ignaz Venzin

Ursina Murer-Fatzer

Disentis/Mustér, ils 19 da fevrer 2024